

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09) i člana 10. i 68. Statuta Općine Centar Sarajevo-Prečišćeni tekst („Službene novine Kantona Sarajevo“, broj 23/04), Općinsko vijeće Centar Sarajevo je, na Petoj redovnoj sjednici održanoj dana 27.03.2025. godine, donijelo

O D L U K U

O ODRŽAVANJU SPORTSKIH PLOHA, IGRALIŠTA I „CICIBAN“ IGRALIŠTA NA PODRUČJU OPĆINE CENTAR SARAJEVO

Član 1. (Predmet)

Ovom odlukom uređuje se način održavanja sportskih ploha, igrališta i „Ciciban“ igrališta na području općine Centar Sarajevo (u daljem tekstu: igrališta).

Član 2. (Značenje pojmova)

- (1) **Dječija igrališta** su površine na kojima su postavljeni dječiji rekviziti i sprave za igru djece.
- (2) **Sportska igrališta** su površine sa ili bez sportskih sprava i rekvizita, koje su namjenjene za sport i rekreaciju građana svih starosnih dobi.
- (3) **Održavanje** podrazumijeva poslove iz člana 3. i člana 4. ove odluke.

Član 3. (Nadležnost)

- (1) Održavanje dječijih i sportskih igrališta u vlasništvu Općine Centar Sarajevo vrši komunalno preduzeće nadležno za održavanje javnih zelenih površina, koje je registrovano i za poslove održavanja dječijih i sportskih igrališta u skladu sa Uredbom o uređivanju i održavanju zelenih i rekreativnih površina u Kantonu Sarajevo.
- (2) Održavanje dječijih i sportskih igrališta podrazumijeva:
 - a) redovne preglede dječijeg i sportskog igrališta odnosno njegovih dijelova, u razmacima i na način koji su određeni projektom i pisanom izjavom izvođača o izvedenim radovima i o uvjetima održavanja građevine i/ili posebnim propisom donesenim u skladu s odredbama propisa koji regulišu oblast građenja, a u slučaju ugrađene opreme, uređaja i instalacija i s planom servisiranja u rokovima propisanim u garancijama proizvođača ugrađenih proizvoda,
 - b) vanredne preglede dječijeg i sportskog igrališta, odnosno njegovih dijelova nakon vanrednog događaja ili po inspekcijskom nadzoru,
 - c) izvođenje radova kojima se dječije i sportsko igralište odnosno njegov dio zadržava ili se vraća u tehničko i/ili funkcionalno stanje određeno

projektom odnosno propisima te aktima za građenje u skladu s kojima je izgrađeno,

d) održavanje higijene i hortikulturnih sadržaja na dječijem i sportskom igralištu u skladu sa planom i programom održavanja javnih zelenih površina,

e) vođenje i čuvanje dokumentacije o održavanju dječijeg igrališta: u kontinuitetu rednih brojeva, sastavljenih zapisnika s priložima o redovnim i vanrednim pregledima, te izvedenim radovima u svrhu očuvanja projektiranih osnovnih zahtjeva za igralište, funkcionalnosti i sigurnosti igrališta u upotrebi.

Član 4. (Održavanje čistoće)

- (1) Održavanje čistoće dječijih i sportskih igrališta vrši JU „Centar za sport i rekreaciju“ Sarajevo (u daljem tekstu: Ustanova), a prema spisku igrališta koji dostavi nadležna općinska služba.
- (2) U poslove održavanja čistoće igrališta ubraja se sljedeće:
 - a) prikupljanje otpadaka,
 - b) pranje rekvizita i sprava,
 - c) pranje ostalih površina,
 - d) košenje trave i sl.
- (3) Za realizaciju poslova iz stava (2) ovog člana obezbijedit će se sredstva u Budžetu Općine Centar Sarajevo, a u skladu sa predviđenim planom održavanja čistoće Ustanove, te ostvarenim prilivom sredstava.

Član 5. (Obaveze Ustanove)

- (1) U cilju kvalitetnijeg održavanja čistoće, Upravni odbor Ustanove će u roku od 30 dana od dana stupanja na snagu ove odluke, donijeti pravilnik kojim će se regulisati način realizacije poslova održavanja iz člana 4., plan redovnog obilaska i vođenje evidencije igrališta, postupanje u slučaju prijava građana i druga važna pitanja.
- (2) Godišnji plan održavanja čistoće igrališta, Ustanova dostavlja u okviru svog redovnog godišnjeg plana Općinskom vijeću Centar.
- (3) Godišnji izvještaj održavanja igrališta, Ustanova dostavlja u okviru svog godišnjeg izvještaja rada Općinskom vijeću Centar.

Član 6. (Preuzimanje dokumentacije)

- (1) Nadležno komunalno preduzeće će preuzeti poslove održavanja nakon što od nadležne općinske službe zapisnički preuzme svu dokumentaciju za dječija i sportska igrališta u vlasništvu Općine Centar Sarajevo.

- (2) Sva novoizgrađena dječija i sportska igrališta nadležna općinska služba je dužna predati nadležnom komunalnom preduzeću i Ustanovi na održavanje, u roku od sedam dana od završetka radova.

Član 7.
(Postupanje sa oštećenim spravama)

- (1) Nadležno komunalno preduzeće i Ustanova su dužni odmah nakon saznanja ili prijave da su neke od sprava ili rekvizita na igralištu oštećeni i da predstavljaju opasnost, obezbijediti da se takva sprava ili rekvizit ne koriste, te postaviti adekvatno obavještenje da su isti van funkcije i da su opasni za korištenje.
- (2) U obavezi su takvu spravu ukloniti u najkraćem roku, odnosno najkasnije 24 sata od prijave ili saznanja.

Član 8.
(Nadzor)

Nadzor nad održavanjem čistoće igrališta obavljaju nadležne općinske službe.


Član 9.
(Prestanak važenja propisa)

Početak primjene ove odluke prestaje da važi Odluka o održavanju sportskih ploha, igrališta i „Ciciban“ igrališta na području općine Centar Sarajevo („Službene novine Kantona Sarajevo“, broj 40/19).

Član 10.
(Stupanje na snagu)

Ova odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će se objaviti u "Službenim novinama Kantona Sarajevo".

Broj:01-19-1619/25
Sarajevo, 27.03.2025. godine



Predsjedavajući Općinskog vijeća

Benjamin Isović

Benjamin Isović

Ova Odluka objavljena je na oglasnoj ploči Općine Centar Sarajevo dana

04-04-2025

